

IRENE ITURSARRI LAB-EKO HAUTAGAIA

«Sindikalismo alternatibo bat proposatzen diegu langileei»

Irene Itursarri LABen zerrenda batean aurkeztuko da, asteazkenean iraganen diren Bitartekari Biltzarrerako hauteskundeetan.

Eneko Bidegain | BAIONA

LAB sindikatu gaztea da Ipar Euskal Herrian eta lehen aldikotz aurkeztuko da Bitartekari Biltzarrerako hauteskundeetan. Irene Itursarri hautagaietarikobat da.

■ Baduzue lan horretan ari-tzeko juridikoki prest dagoen jendea?

LABen baitan badugu arlo juridiko bat eta jadanik langile batzuk laguntzen ditugu beren dossierretan. Bistan dena, Bitartekari Biltzarrean hautetsiak baldin baditugu, ber bidetik segituko dugu eta arlo hori indartuko.

■ Hauteskundeen helburua, LAB egituraren geroaren indartzea ere bada?

Bai. Alde batetik, Bitartekari Biltzarra bera inportantea da. Defentsa guti duten langileek badute aukera bat beren eskubideak zainduak eta defendituak izateko. LAB horretan ari da. Bestalde, kanpaina horrekin LABek bere burua ezagutarazten du eta hor dagoela erakusten, langileak defendituko dituela eta badiela langileen defendatzetik at beste proiektu bat, hala nola, langileekin batera eta langile gisa sindikalismo alternatibo bat proposatzea, globalizazioaren kontrako mugimenduan arituz eta, horrekin batera, beste mundu posible bat eraikitzean lan eginez.

■ Sindikalismo alternatiboa bertze sindikatuei begira?

Erran nahi du sindikalismoa zinez langileek egiten dutela. Horiek dute erabaki behar zer nahi duten egin. Horiek egiten dute sindikatu. LAB izanen da langile horiek nahi dutena. Horrek erran nahi du ere gure mundua ez dugula Euskal Herrian mugatzen. Beste herrietako langile guztiekin lan egin nahi dugu. Jadanik baditugu adibide batzuk. LABek hainbat foro sozialetan parte hartzen du.

■ Zuen ardatzetatik bat prekarietatea da.

Hastapenetik jorratzen dugu gai hori. Gero eta langile prekario gehiago ditugu, lan kontratu mugatuetan edota sortzen diren hainbat kontratu mota berrietan ari direnak... Anitzetan, beste sindikatuek, behar bada, ez dute arlo hori hainbeste lantzen. Alta, jende horiek ere badute zer erran. Ez dute egon behar itxoi-ten zer eskainia zaien, baizik eta haiek ere parte hartu behar dute.

■ Zein da zuen lan eremua? Sindikatuek, oro har, enpresa dute gune nagusi. Prekarietatearekin ez da hain argi zein den lanerako gunea.

Hori da, hain zuzen, hautsi nahi duguna. Bistan da enpresetan taldeak sortzea biziki garrantzitsua dela. Baina horrez gain, enpresen artean ere loturak izatea eta bat bestearen sostengatzaile



BOB EDME

PREKARIETATEA

«Anitzetan beste sindikatuek ez dute arlo hori hainbeste lantzen. Alta, gero eta langile prekario gehiago dago eta horiek ere badute zer erran»

izatea garrantzitsua da. Eta baita enpresetan kokatzen ez diren langile guztientzat ere. Tokian-tokian antolatzea ere inportantea da, horrek baitu hausten paretari. Parada eskaintzen zaie enpresetan ez diren langileei ere, besteekin batera borrokan ari zeko eta antolatzeko.

■ Beraz, gehiago da lanetik kanpoko militantzia? Kultura abertzalean ohitura den militantzia mota hori?

Bai. Erran behar da LAB Euskal Herriko langileen sindikatu dela. Erran nahi du Euskal Herrian lan egiten duten guzien sindikatu izan nahi duela. Segur da horrek militantzia bat eskatzen duela eta hori da gure parioa: jendeak antolatzea beren denboraren, nahien eta ahalen arabera.

■ LAB sindikatu abertzalea da. Hauteskunde hauetan LABek joera desberdinetako abertzaleak bildu ditu bere zerrendetan. Aldi berean,

abertzaleak zerrenda desberdinetan badaude. Ez da pixka bat nahasia?

LABen proiektua da Euskal Herri mailan antolatzea, zazpi herrialdeak beren osotasunean hartuz. Guk mezu bat zuzentzen diegu abertzaleei, hala nola beste mundu bat eraikitzeke Euskal Herriko langileek antolatu behar dugula. Garrantzitsua da tokian tokiko langileek nahi duten mundua antolatzea eta eraikitzea, bizi duten errealitatea eta kulturaren arabera.

■ Abertzale etiketarekin, abertzale ez diren langileen gan ez da sortzen halako bakartze bat? Nola sortzen dira langile abertzale eta ez abertzaleen arteko zubiak?

Prekarietatea edo emazteen arazoaren adibideak har ditzagun. Ez dira abertzaleen kezkek bakarrik, baizik eta beste hainbat jenderena ere. Horrekin, jadanik, beste edozein pertsonari irekitzen diogu gure sindikatu.

Gero, Euskal Herrian bada errealitate kultural eta sozioekonomiko bat. Guk sindikalismoa horretan oinarritzen dugu.

■ Badira abertzaleak ez diren jendeak zuen zerrendetan?

Jendeari ez diogu galdetzen ea abertzalea den ala ez. Jendea proiektu bati lotzen zaio, jakinez zer den LAB.

■ LABek traba anitz izan ditu bidean, bertze hauteskunde batzuetan ez baitzaio aurkezteko ahalik eman. Nola egiten du bere xiloa?

Indarra gauza konkretuei ematen diegu. Langileek laguntza behar badute, horretan egiten dugu parioa. Bistan dena, borroka diren tokietara ere hurbildu behar dugu. Gure ahalein arabera ahaleginduko gara laguntzaren ematen. Beste sindikatuek nola jokatzten dute? Guk gure lana egiten dugu. Egia da salatu behar dela, kasu anitzetan, errepresentatiboa ez den sindikatu bati traba anitz ezartzen zaiola. Badira bost sindikatu errepresentatibo Frantziako Estatuan botere anitz dutenak, eta bertzeak ahal duten bezala ari dira. Funtsean, lana egiten bada, langileak ohartuko dira non kokatzen garen, gu eta besteak.

AGENDAROA 2003

~~15€~~ Durangon 12€

ZUHAITZAROA 2003 2€

DURANGON SALGAI 1,5€

2003

EKKME



Kultura Sailak diruz lagundutako egunkaria